

25/01/2003

Sikap pelajar Al-Azhar dikesali

PELAJAR Malaysia yang menutup minda walaupun sudah menjejakkan kaki seperti ke Universiti Al-Azhar di Mesir yang mengamalkan sikap liberal dan pragmatik, sebenarnya menipu diri sendiri. Mereka juga melepaskan peluang mencedok nilai dan menerap ciri hidup yang mengutamakan kesederhanaan sebagaimana majoriti rakyat Mesir apabila mereka sebaliknya memilih menjadi lebih ekstrem berbanding anak negeri itu. Akhirnya selain terlalu mengongkong diri dengan bergaul sesama pelajar dari Malaysia saja, mereka juga menjadi golongan antiestablishment yang amat merugikan. Perdana Menteri, Datuk Seri Dr Mahathir Mohamad ketika mengulas sikap negatif sesetengah pelajar Malaysia itu sewaktu berkunjung ke universiti tertua di dunia itu, memang sepatutnya kesal dengan tindak-tanduk pelajar kita itu. Mereka jelas enggan membuka mata dan melihat sendiri betapa rakyat Mesir menjalani kehidupan selesa hasil gabungan peninggalan tamadun Firaun sedang penganut Kristian dan Islam hidup penuh bertoleransi dengan gereja dan masjid kadangkala terletak bersebelahan satu sama lain.

Malangnya, pelajar kita tidak memanfaatkan kewujudan persekitaran itu sebaliknya mereka dengan mudahnya membiarkan diri mereka diresapi pemikiran ekstrem yang dijulung sebagai kehendak Islam yang sebenar. Mereka ini begitu mudah dipengaruhi sesetengah pemimpin parti yang kononnya memperjuangkan Islam yang sering berkunjung ke Kaherah hingga menjadi jumud. Akibat membiarkan diri diperalatkan bagi kepentingan aliran politik anti-kemajuan dan faktor luaran itu, ramai pelajar kita di Al-Azhar tidak begitu berjaya dalam pengajian mereka.

Tidak kurang juga yang gagal menguasai bahasa Arab selain tidak mempunyai kelayakan setimpal menyebabkan pentadbir Al-Azhar mungkin memperketatkan syarat kemasukan pelajar. Ini akan menyebabkan kelonggaran kepada pelajar dari institusi pengajian tinggi swasta di Malaysia untuk melompat tahun pengajian mungkin ditarik balik. Demi menjamin hanya pelajar kita bertaraf tinggi saja ke Al-Azhar, kerajaan pula merancang mewajibkan semua pelajar Malaysia di Mesir mendaftar diri dengan kedutaan kita.

Tidak syak lagi dalam memilih bidang pengajian, pelajar kita harus memikirkan juga peluang mendapatkan pekerjaan setelah lulus kelak. Peluang kerja bagi tahfiz dan lulusan pengajian agama amat terhad berbanding siswazah sains, teknologi maklumat dan kejuruteraan. Apabila lepasan pengajian agama gagal mendapat pekerjaan, mereka dengan cepat menyalahkan kerajaan. Lulusan ini tidak peduli bidang pengkhususan mereka sebenarnya menyukarkan kerajaan menyerap mereka ke dalam perkhidmatan awam.